

Gwnz Roen Banggungz

扶 贫 路 上

□ Siz Bungzcwngz/石鹏程 Siz Beilingz/石佩灵

Vangz: Dwg ha!
Gyangh: Daj gizlawz vat congh ne?
Byoengq: (Fwngz vix baihnaj gwnzbya) Couh baihnaj goengq bya haenx ha!
Cinz: Yienghneix mbanj sou couh youq baihlaeng goengq bya neix?
Vangz: Couhdwg ha!
(Ciengq) Daj neix byaij daengz Veizdangz raeuz,
Heux bya gvaq gemh cibhaj leix;
Langhnaeuz ndaej hoenx byoengq congh dat,
Liz neix mbouj daengz song leix gyae.
Cinz: Gyawj cib lai leix loh bw! Yienghneix, sou vihmaz mbouj fan gvaq bya bae ne?
Vangz: Ae, ndaek dat neix yaek miz bak mij sang, lienz duzlingz cungj nanz benz hwnjbae; danghnaeuz vunz byaij ndaej, cojgoeng caeux couh mbouj gvax baenzlai gyae lo.
Gyangh: Danghnaeuz dub byoengq aen gamj neix, gujsuenq miz geijlai raez?
Byoengq: Ciuq suijligiz daeuj caeksuenq hix couh roekcib lai mij ba.
Gyangh: (Ngeix hwnjdaeuj) O——Gungh-cwngzlieng hix mbouj suenq hung ha!
Byoengq: Danghnaeuz doeng goengloh le, ndawmbanj miz rinnohmou ……
Cinz: Gijmaz, gijmaz heuh guh rinnohmou?
Byoengq: (Sikhaek haeuj baihindaw bae, gaem ndaek rin geizheih lumj nohsamcaengz nei) Yawj, couhdwg cungj rin neix!
Gyangh: A——Neix heuhguh fanghgejsiz, dwg cungj rinliuh ndaej gyagoeng baenz gunghyibinj haenx!
Vangz: (Ciengq) Henz Mbanjveizdangz geij goengq bya,
Cienzboh dwg cungj rinnohmou;
Bingzseiz aeu riengh mou yiengz vaiz,
Seiqdaih doxbuenx lumj haexma.
Cinz: Eiya, caen dwg yak mbouj aeu doxgaiq, vunz bya mbouj rox bauj ha!
Byoengq: Mbouj dwg mbouj rox——
(Ciengq) Aenvih doeng loh dwg gvanhgen,
Loh doeng cij rox miz gihvei;
Ruzfiengz ciq naq caj rumzdoeng,
Muengh bauj danqheiq simgaenj ndwi!
Gyangh: Deng, doengloh dwg gij saeh gaenj-gip seizneix!
Vangz: Ei, miz ndaek gyaеujbyaraiz neix dangj roen, sim vunzlai cungj liengz liux.
Cinz: Mbouj ndaej, sou yaek caeuq de dox-hoenx, nyengh mbouj doeknaiq!
Vangz: Hai, duzmou caeuq duzguk doxhoenx, mbouj ndaej hingz.
Gyangh: Vei, de gyaеujbyaraiz cungj dwg aeu gijmaz soujduenh gag ciemq Veizdangz?
Vangz: De ha, unq geng giem guh, dwg caen rox gyaj!
Ndei, sou menh gangj, gou yaek ganj baema ra de banhsaeh, bae gonq lo. (Roengz)
Cinz: Dwg caen rox gyaj, baenzlawz gangj?
Byoengq: Daih’it,
(Ciengq) Ndaw swnghcanjdui geij bouxdaeuz, Cungjdwg beixnuengx de daeuj dang;
(Bwz) Daihngeih,
(Ciep ciengq) Lij miz saeh goeng’ik ndaw-mbanj,

Cienzboh baulamx byawz gamj gangj!
Cinz: Hai, guengz lai, yakrwix lai lo!
Byoengq: Bi’ gvaq seizdoeng, cawz ceh youz-cai caqyouz le, dangseiz lij caeuq geij bak gaen vafeiz, de geij ndaek ganbu ndawdui hix cungj gag faen liux lo.
Gyangh: Baenzneix cungj mbouj geih saekdi, nanzdauh cwngfuj ndawyangh cungj mbouj rox saekdi?
Byoengq: Ei, dou gizneix bya sang vuengzdae q gyae, aiq dwg ndawyangh guenj mbouj daengz baenzlai bw!
Cinz: Bei, yaeuh vunz hangz vunz, fouz fap fouz dien!
Byoengq: Haenx lij yungh gangj, geij bi gonq ha——
(Ciengq) Guekgya boujdiep coih gvihcaeng-raemx,
Bued hawj suijniz de caemh comz;
Moix hoh cij fat sei q haj bau,
Lw gij suijniz gag gwn liux!
Gyangh: Cungj gag gwn liux?
Byoengq: Miz maz banhfap, ranz de seizneix youq geij fungh suijnizlouz haenx, couhdwg bihaenx aeu suijniz lwyawz daeuj guh ha!
Gyangh: Baenzneix couh miz geij cib dun bw!
Byoengq: Ai q miz bw.
Cinz: Baenzneix gangj daeuj, de caen dwg ndaek baqvungz ndawmbanj lo!
Byoengq: Ei——
(Ciengq) Gaem boux dam’ aeu, fanj boux nduknaeuh, -
Vihmaz mbanj raeuz muengh mbouj raen?
Cinz: (Ciep ciengq) Ndawbiengz ndei yak vunz sim dingh,
Bauqwngq daengz seiz coih nanz deuz!
(Bwz) Lauxbanj, boux dungxyak rimroenx haenx, deuz mbouj ndaej law!
Byoengq: Vah dwg baenzneix gangj, mbouj rox seizlawz cij daeuj daengz ha! Ndei, gou haeujbae yawjyawj, gij souh rek daihsei q hix wnggai cug lo. (Roengz)
Gyangh: Deng, raeuz hix aeu ganj loh lo.
(Song vunz haidin /lizhai)
Cinz: Suhgi ha——
(Ciengq) Mbouj daeuj saedcaih mbouj rox-daengz,
Byawz rox Veizdangz baenzneix rwix.
Gyangh: Dwg ha, nanz siengj ndaej daengz ha!
(Ciep ciengq) Langh ra cwzyin caz goekgaen, Cien sei fanh geu youq lingjdauj.
Cinz: O, lij miz——
(Ciengq) Haemhneix gwnninz youq Veizdangz, Song raeuz ndangfaenh baenzlawz bauq?
Gyangh: Eiya, mbouj dwg gangj ndei la!
(Ciep ciengq) Lauj Gyangh、Cinz Giuj vunz diegroq,
Dwg boux dajcawx canghgajmou.
Cinz: Yienghhaenx raeuz baenzlawz cij mbouj hei qgyaj caen guh ne?
Gyangh: Lij mbouj yungzheih——youq cauz-mou lwnh gyaq seiz, couh……
Cinz: (Gaenq rox ei qsei) Rox lo——
(Ciengq) Couh gangj hangzcingz ok vunzhung, Itseiz gig nanz gangj baenz gyaq;
Gyangh: Couhdwg ma——

(Ciep ciengq) Haeujdaengz gak hoh cunz minzcingz,
Daengjrwz lai dingq siuj capvah.
Cinz: Deng, mingzmingz Veizdangz——
(Ciengq) Bauqdaеuj ciengx vaiz dwg haj hoh, Baenzlawz youh bienqbaenz sam ranz?
Gyangh: Lijmiz ne——
(Ciep ciengq) Cienzngaenz it fanh bienq caet cien,
Vihmaz yenzyinh nyinhcaen caz!
Cinz: Ae, gizneix, caen dwg duz nengznyaen heuloeg ndeu ha. Suhgi, baezlaeng mwngz baenzlawz siengj ha?
Gyangh: Raeuz aeu ra ok aen banhfap ndeu, gaijgez fat cienz banggungz oknyienh gij conghroh haenx bae!
Cinz: Neix ndei banh!
Gyangh: Gangj!
Cinz: Baezlaeng ha——
(Ciengq) Dang’an banggungz aeu dawzcinj, Fat cienz hanghmoeg aeu gvidingh;
It aeu cawjranz sinhfwncewng,
Ngeih aeu bonjfaenh daeuj nyinhlingx.
Gyangh: Cungj banhfap neix ndei! Baezlaeng ha——
(Ciengq) Buedroengz leih minz gak hanghmoeg, Cienvunz fucwz gaen daengz daej.
Cinz: Dwg ha, ——
(Ciep ciengq) Mingzsaеq cangmuz sij cingcu j, Gyaep cwz cidu aeu genhciz!
Gyangh: Cinz Giuj ha, mwngz naeuz baez-laeng gij hong banggungz Mbanjveizdangz, baenz-lawz bae guh?
Cinz: Hai! Neix dwg gij saeh yangh dangjveij mwngz lo.
Gidij gunghcoz ma, gou haengjdingh dingq mwngz Lauj Gyangh lo!
Gyangh: Mbouj, dangjveij lij caengz miz gezyi, neix dwg siengj sien dingq gij yigen mwngz ma.
Cinz: Ndei ha——
(Ciengq) Daih’it goengloh aeu hai doeng, Yienzhaeuh fatdoengh ra hanghmoeg;
Maeuzveh haifat fanghgejsiz,
Seng’ei q swghinh yienj hungzduz.
Gyangh: Mbouj loek. Gangj ndaej ndei!
Cinz: Lij miz gienh saeh dem!
Gyangh: Laebdaeb gangj!
Cinz: Haedsaed caizliuh aeu cingcu j, gou cinzciuj. Mwngz hing geq——
Gyangh: Vei, mwngz, mwngz gangj gijmaz?
Cinz: Hw, mwngz lumz la, mwngz mbouj dwg hing geq caujbyaek seiz aeu daeuj guh boiqliuh haenx ma?
Gyangh: Ei, gaej luenh bamz, gangjriu mwngz lai hnaeuz caen dahraix! A, a, a……(Loq rox di lo)
Deng, mwngz couhdwg gij cinzciuj ndaej cawz haeu sing bya haenx lo!
Cinz: Mbouj loek ha, de gyaеujbyaraiz danghnaeuz caen miz saedsaeh dahraix……
Gyangh: Gou “Hing geq!”
Cinz: Dou “Cinzciuj”!
Hab: Couh dawz duz byaraiz neix, cab baenz song faj, faen song mbiengj hojgoh, daihgya gwn liux bae! (sat)